



Pou Piblikasyon Imedya: 24/10/2023

GOUVÈNÈ KATHY HOCHUL

GOUVÈNÈ HOCHUL ANONSE NOUVO DIREKTIV ETA A POU AJANS FÒS DE LÒD YO LÈ Y AP ENTÈVNI NAN ENSIDAN DOMESTIK YO

Politik modèl la dekri pi bon pratik ak pwosedi ki konsidere twomatis ak sentre sou sivivan yo pou ofisyel lapolis ak sipèvizè ki ankouraje sekirite viktim ak ofisyel yo, konekte moun yo ak sèvis ak sipò yo, epi prezève prèv yon krim, pam i lòt sijè yo

Gouvènè Hochul garanti envestisman 1 milyon dola pou elaji plis itilizasyon Lwa sou Siyal Alèt Eta New York la nan sitiyasyon vyolans konjigal ak vyolans ki baze sou sèks

Gouvènè Hochul siyen lejislasyon sou prevansyon vyolans domestik nan reyinyon avèk sivivan yo nan Albany; Foto yo disponib [isit la](#)

Gouvènè Kathy Hochul te anonse nouvo direktiv eta a pou depatman lapolis ak biwo cherif yo lè y ap entèvni nan ensidan domestik yo. [Politik Modèl sou Ensidan Domestik pou Fè Respekte Lalwa nan Eta a](#) dekri pi bon pratik ak pwosedi ki konsidere twomatis ak sentre sou sivivan pou ofisyel lapolis yo ak sipèvizè yo swiv, nan objektif pou ankouraje sekirite pou viktim yo ak ofisyel yo, konekte moun yo ak sèvis ak sipò yo epi prezève prèv yon krim, pam i lòt sijè yo. Gouvènè a te garanti 1 milyon dola pou elaji plis itilizasyon [Lwa sou Siyal Alèt Eta a](#) nan sitiyasyon vyolans konjigal ak vyolans ki baze sou sèks lè li bay òganizasyon kominotè yo fòmasyon ak asistans teknik pou yo kapab fasilité depo òdonans sa yo ki kapab sove lavi. Gouvènè Hochul te siyen tou S.5935/A.5040 ak S.5915/A.5347, de nouvo lwa ki gen rapò ak prevansyon vyolans domestik, pandan yon tab wonn diskisyon ak sivivan yo nan Albany.

"Mwen pran angajman pou m dirije yon administrasyon ki trete sivivan yo avèk diyite ak respè", **Gouvènè Hochul te deklare**. "Sa a pèsonèl pou mwen: manman m te yon defansè pandan tout lavi pou viktim abi domestik, epi fanmi nou te fonde yon kay tranzisyon pou sivivan yo nan Lwès New York. Aksyon sa yo baze sou angajman kontinyèl administrasyon mwen an pou ede sivivan yo epi ba yo resous, sipò ak enfòmasyon yo bezwen pou yo rekipere ak rekonsenti".

Direktè Egzekitif Biwo pou Prevansyon Vyolans Domestik (Office for the Prevention of Domestic Violence, OPDV) Eta a, Kelli Owens, ak Direktè Jeneral Safe Horizon, Liz

Roberts, te rejwenn Gouvènè Hochul pou diskisyon tab wonn lan, kote enfòmasyon yo pral enfòme politik administrasyon li yo nan lavni pou fè fas a vyolans domestik ak vyolans ki baze sou sèks. Objektif la se baze sou kreyasyon yon nouvo kouran finansman fleksib Gouvènè a pou resous sivivan yo nan bidjè ane fiskal 2024 la, ki te gen ladan tou 5 milyon dola nan finansman asistans lokal pou OPDV bay asistans finansye dirèk pou viktим ak sivivan vyolans domestik. Oktòb make nan Eta New York ak nan nasyon an kòm Mwa Sansibilizasyon sou Vyolans Domestik.

Direktè Egzekitif Biwo pou Prevansyon Vyolans Domestik Eta New York la, Kelli Owens, te deklare, "Eta New York devwe pou I travay an kolaborasyon pou bay sivivan vyolans domestik yo resous ki nesesè. Nou pa kapab fè sa san pale dirèkteman ak ekspè yo – sivivan yo. Mèsi, Gouvènè Hochul, paske w rekonèt sa epi paske w te pran tan pou w koute toutbon. Mwen espere kontinye diskisyon sa a ak sivivan yo ak founisè sèvis yo atravè Eta New York epi travay ak Gouvènè a pou kreye politik ki konsidere sivivan yo pou Eta New York".

Direktè Egzekitif Jeneral Safe Horizon Ian, Liz Roberts, te deklare, "Nan Safe Horizon, pi gwo òganizasyon asistans viktим san bi likratif nan peyi a, nou konnen byen ki jan entèsekson vyolans a zam ak vyolans domestik souvan mennen nan trajedi. Si nou pral vrèman kreye chemen ki mennen nan sekirite pou Nouyòkè ki gen risk sibi krim sa yo ak lòt krim, sa pral mande pou nou tout - gouvènman an ak kominate sèvis viktим yo - travay ansanm pou kenbe fanmi yo an sekirite. Mwen rekonesan anvè Gouvènè Kathy Hochul ak ekip li a paske yo te leve wwa sivivan yo epi paske yo te pwomèt pou fè tout sa yo kapab pou fè New York tounen yon flanbo sekirite ak gerizon".

Gouvènè Hochul te elaji radikalman itilizasyon Lwa sou Siyal Alèt Eta a apre asasina 2022 poutèt zafè ras nan makèt Tops nan Buffalo. Lwa a, ke yo rele tou lwa sou Òdonans Pwoteksyon kont Risk Ekstrèm (Extreme Risk Protection Order, ERPO), fèt pou anpeche moun ki montre siy yon menas pou tèt yo oswa pou lòt moun achte oswa posede nenpòt kalite zam, pandan I ap founi garanti pwosedi pou asire yo pa retire okenn zam afe san pwosedi ki nesesè.

Nouvo envestisman 1 milyon dola sa a pral finanse fòmasyon ak asistans teknik pou òganizasyon kominotè yo pou yo ka ede potansyèl petisyonè ERPO yo – manm fanmi, ofisyèl lekòl yo, ak founisè swen sante ak sante mantal, pami lòt - idantifye konpòtman ki gen risk ekstrèm epi navige nan pwosesis jidisye a pou ogmante plis itilizasyon lwa sou sekirite publik enpòtan sa a. Divizyon Sèvis Jistics Kriminèl (Division of Criminal Justice Services, DCJS) eta a ak OPDV pral travay ak 10 Konsèy Rejyonal sou Vyolans Domestik eta a pou aplike inisyativ sa a.

Nouvo Politik Modèl sou Ensidan Domestik pou Fè Respekte Lalwa a adrese chanjman enpòtan nan politik ak pratik fòs de lòd yo ki te rive depi eta a te premye bibliye direktiv an 2010, ansanm ak yon konpreyansyon ki ogmante sou efè twomatis yo, nesesite pou evalye faktè letalite lè y ap entèvni nan ensidan sa yo, ak enpòtans pou mete viktим yo ak sivivan yo nan sant nenpòt repons ak kenbe moun ki lakòz domaj kòm responsab konpòtman yo. Konsèy Fòmasyon Lapolis Minisipal Eta a, kote DCJS bay sipò

anplwaye yo, te adopte politik la apre li te travay ak ekspè sou zafè a nan domèn siveyans, prevansyon ak repons a vyolans domestik, ak fòmasyon fòs de lòd yo.

Komisè Divizyon Sèvis Jistis Kriminèl (Division of Criminal Justice Services, DCJS) Eta New York Ia, Rossana Rosado, te deklare, "Ensidan domestik yo se pamí apèl ki pi komen ak pi grav ajans yo resewva. Politik modèl konplè sa a fèt pou bay ofisyè k ap entèvni yo enfòmasyon, zouti ak resous yo bezwen pou jere ka sa yo yon fason efikas. Mwen remèsye manm Konsèy Fòmasyon Lapolis Minisipal yo ak ekip mwen an nan DCJS pou travay yo ak angajman yo pou amelyore aktivite siveyans yo ak fason sistèm jistis kriminèl la reponn viktim yo ak sivivan yo".

Direktris Biwo Sèvis pou Viktim Eta New York Ia, Elizabeth Cronin, te deklare, "Sa mande gwo kouraj pou yon moun nan yon relasyon abizif chèche èd nan men lapolis. Yon fwa yo fè pa sa a, menm lè fè apèl sa a ka lakòz yon sitiayson danjere ogmante, li enpòtan anpil pou ofisyè lapolis yo gen pi bon enfòmasyon, fòmasyon, ak konpetans lè y ap entèvni. Mwen remèsye manm Konsèy Fòmasyon Lapolis Minisipal yo pou lidèchip yo epi mwen ankouraje tout ajans lapolis yo pwofite direktiv enpòtan sa a".

Anplis anons disponiblite direktiv enpòtan sa a pou fè respekte fòs de lòd yo ak finansman pou elaji itilizasyon Lwa sou Siyal Alèt Eta a, Gouvènè Hochul te siyen Iwa S.5935/A.5040 ki pwomilge "Lwa sou Kat Espwa" (Hope Card Act) ki mande Biwo Administrasyon Tribunal Ea a pou devlope yon pwogram pou bay kat ki gen enfòmasyon sou yon lòd pwoteksyon final gratis pou moun yo. Sa pral pèmèt sivivan yo fè respekte lòd pwoteksyon yo san yo pa oblige pote kopi ofisyèl yo avèk yo epi san yo risk pou pèdi li. New York se sisyèm eta ki aplike yon pwogram Kat Espwa.

Senatè Eta a, Cordell Cleare, te deklare, "Ofri sivivan vyolans domestik yo sèvis, pwoteksyon, lapè nan tèt ak ESPWA se youn nan obligasyon prensipal nou yo. Lwa sou Kat ESPWA a pral transfòme yon lòd pwoteksyon apati yon dokiman legal long pou tounen yon kat dinamik ak dirab, ki pral aksesib byen fasil epi ka pataje pou fè respekte lalwa epi kenbe moun nou renmen yo an sekirite; ak pi enpòtan toujou, plen ak ESPWA!"

Manm Asanble Sarah Clark te deklare, "Kat Espwa yo kreye yon chemen pou sivivan yo pataje detay ki enpòtan sou yon lòd pwoteksyon avèk diskresyon ak byen vit nan soti kopi yon vèsyon ki pi pratik epi ki ka itilize ansanm ak fòm long tradisyonèl la. Kat Espwa yo pral bay sivivan vyolans domestik yo plis kontwòl pou aplike lòd pwoteksyon yo epi pou yo viv lavi yo an sekirite ak konfyans. Mwen fyè dèské m te prezante pwojè Iwa sa a nan Asanble a, epi mwen remèsye Gouvènè Hochul pou patenarya li nan fè New York vin sisyèm eta pou bay sivivan yo ottonomi ak Iwa enpòtan sa a".

Gouvènè a te siyen tou lejislasyon S.5915/A.5347 ki mande Biwo pou Prevansyon Vyolans Domestik Eta a distribiye materyèl enfòmasyon sou abi ekonomik. Dapre Kowalisyon Nasyonal Kont Vyolans Domestik (National Coalition Against Domestic Violence, NCADV), plis pase 90 pouzan sivivan vyolans domestik te sibi abi ekonomik, men anpil moun pa wè tèt yo tankou yo nan yon relasyon abizif si yo pa sibi domaj fizik.

Materyèl enfòmasyon pou viktim ak sivivan vyolans domestik ak vyolans ki baze sou sèks yo pral genyen koneksyon ak resous lojman, biwo sèvis sosyal lokal yo, ak plis ankò pou ede moun yo jwenn sekirite ak estabilite.

Senatè Eta Kristen Gonzalez te deklare, "Abi ekonomik - tankou anpil fòm vyolans domestik - yo neglige, yo pa ase siyale yo, epi pafwa difisil pou rekonèt. Nan egzije Biwo sou Prevansyon Vyolans Domestik pou l distribiye materyèl enfòmasyon sou yon fòm vyolans domestik ki prèske toujou prezan nan relasyon abizif, pwojè lwa sa a pral pèmèt sivivan abi ekonomik yo rekonèt abi ekonomik sou plizyè fòm li epi ba yo zouti yo bezwen jwenn èd. Nou remèsye Gouvènè a paske li siyen pwojè lwa sa a nan lwa, epi paske li ankouraje plis entèvansyon nan vyolans domestik ki konsidere twomatis".

Manm Asanble Linda B. Rosenthal te deklare, "Abi ekonomik se yon fòm envizib vyolans domestik, sa ki fè li de pli zan pli enpòtan pou nou pote limyè sou pratik danjere sa a. Malgre yo mwens konnen yo, abi ekonomik yo trè komen, sa ki afekte plis pase 90% sivivan vyolans domestik yo. Lè yon moun ap eseye kite yon sitiyasyon danjere, dènye bagay li ta dwe gen pou enkyete l se sou ki jan li pral fè pou l rekonstwi lavi l oswa si agresè a te detwi kredi li. Mwen remèsye Gouvènè Hochul paske li siyen lejislasyon mwen an pou mete materyèl enfòmasyon yo disponib pou sivivan yo nan tout eta a pou yo ka rekonèt abi ekonomik yo epi yo konnen ki kote pou yo ale pou yo jwenn èd".

Politik Modèl la adrese chanjman ki fèt nan pratik ki fè respekte lalwa, mizajou nan lwa eta a, ki gen ladan Lwa sou Siyal Alèt la ak fason pou entèvansyon fòs de lòd yo plis santré sou sivivan, tankou:

- Evalye letalite potansyèl pou yon viktim nan poze kesyon sou aksè patnè yo a zam oswa menas pou fè tèt yo mal oswa lòt moun, ensidan trangle anvan yo, domaj sibi pandan gwo sès, jalouzi ak vyolans ki ogmante. Si yon moun reponn wi pou kesyon sa yo, direktiv la bay ofisyè yo enfòmasyon detaye sou pwochen etap yo ta dwe pran, tankou konekte viktim nan imedyatman ak planifikasyon sekirite lè yo rele yon liy dirèk eta oswa lokal sou vyolans domestik oswa fè aranjman pou yon avoka rive sou plas; jwenn prèv nan tout sous posib, tankou dosye telefòn, videoyo, ak lektè plak machin, pa sèlman viktim nan; epi konsilte ak pwokirè yo anvan yon akizasyon si yo te akize yon moun anrapò ak ensidan an.
- Detèmine si li nesesè pou jwenn yon ERPO pou retire nenpòt zam afe nan kay la si swadizan agresè a reprezante yon danje pou viktim nan, pou tèt li oswa pou lòt moun. Konsèy Fòmasyon Polis Minisipal (Municipal Police Training Council, MPTC) la genyen tou yon [Politik Modèl Lòd Pwoteksyon pou Risk Ekstrèm \(Extreme Risk Protective Order Model Policy, ERPO\)](#) epi DCJS te bay fòmasyon sou sijè a pou ede pwofesyonèl ki fè respekte lalwa yo avèk evalyasyon sa a ak responsablite yo dapre lalwa.
- Sèvi ak pwòp mo moun nan lè w ap dokimante ensidan an, olye w tire konklizyon: "Mwen pa ka siyen sa a oswa l ap touye m", olye pou w mete deklarasyon an, tankou "viktim nan refize kolabore." Ofisyè lapolis yo dwe ranpli

yon [Rapò sou Ensidan Domestik Eta New York](#), kit gen yon agresyon ki te fèt oswa pa fèt oswa si gen yon arestasyon ki fèt.

- Enfòme yo sou [disponibilite sèvis legal sivil enpòtan yo](#) pou yo ka jwenn lòd pwoteksyon, ak asistans pou gad ak lojman, pami lòt pwoblèm legal ki soti nan sitiyasyon yo kòm viktим.
- Konprann ki jan efè twomatis ak kontwòl fòse yo ka lakòz viktим ak sivivan vyolans domestik yo ezite pou yo di sa ki te pase, rakonte evènman yo nan lòd ki pa lojik, epi pè figi otorite yo oswa ke patisipasyon lapolis ka fè yo sibi domaj alavni.
- Sèvi ak kamera yo pòte sou kò yo, sa ki ka afekte volonte yon viktим pou bay enfòmasyon. Si yon viktим mande yon ofisyel sispann anrejistreman, demann sa a ta dwe dokimante sou kamera anvan anrejistreman an dezaktive.

Biwo depatman lapolis ak cherif yo pa gen obligasyon pou yo adopte Politik Modèl sou Ensidan Vyolans Domestik pou Fè Respekte Lalwa a: Li fèt pou chak ajans ka devlope pwòp règleman yo ak pwosed yo pou pi byen sèvi bezwen inik nan kominate yo. Developman politik modèl yo se yon fonksyon debaz Konsèy Fòmasyon Lapolis Minisipal la, ki etabli tou kondisyon pou fòmasyon debaz pou lapolis ak ofisyel lapè nan Eta New York ki gen otorite legalman, ak sètifikasyon enstriktè polis ak ofisyel lapè, pami lòt responsabilite.

Liy Asistans sou Vyolans Domestik ak Vyolans Seksyèl (Domestic and Sexual Violence Hotline) Eta New York la, bay sipò konfidansyèl gratis, 24/24 ak 7/7 epi li disponib nan pifò lang: 800-942-6906 (apèl), 844-997-2121 (mesaj tèks) oswa [@opdv.ny.gov](#) (chat). Moun yo ka ale tou sou [OVS Resource Connect](#) pou jwenn yon pwogram asistans pou viktим nan kominate yo a. [Biwo Sèvis pou Viktим](#) (Office of Victim Services, OVS) lan finanse ak sipòte 239 pwogram asistans pou viktим nan tout eta a ki bay sèvis esansyèl, tankou konsèy pou kriz, gwoup sipò, jesyon ka, abri ijans, èd legal sivil, ak asistans pou demenajman, pami lòt asistans, pou viktим yo ak sivivan vyolans domestik, agresyon seksyèl ak lòt krim, ak fanmi yo. Ajans lan bay tou [yon garanti sekirite finansye enpòtan](#) pou tout moun ki pa gen lòt resous pou peye pou depans yo te fè akòz krim lan.

[Divizyon Sèvis Jistics Kriminèl Eta New York la](#) se yon ajans sipò jistics kriminèl a plizyè fonksyon ki gen yon bann responsabilite, ki gen ladan yo fòmasyon pou moun k ap fè respekte lalwa yo; koleksyon ak analiz done krim atravè tout eta; antretyen dosye enfòmasyon istwa kriminèl ak anprent; sipèvizon administratif baz done ADN eta a, an patenya avèk lapolis Eta New York la; finansman ak sipèvizon pou pwogram libète kondisyonèl ak koreksyon kominate yo; jesyon finansman jistics penal federal ak eta yo; sipò pou ajans ki gen rapò ak jistics kriminèl toupatou atravè eta; ak jesyon Rejis Delenkan Seksyèl eta a (State's Sex Offender Registry). Swiv ajans lan sou [Facebook](#), [Instagram](#) ak [X \(anva sa li te rele Twitter\)](#).

[Biwo sou Prevansyon Vyolans Domestik nan Eta New York](#) se sèl ajans eta nan nivo egzekitif peyi a ki devwe ak pwoblèm vyolans ki baze sou sèks. Swiv ajans lan sou [Facebook](#), [Instagram](#) ak [X \(anvan sa li te rele Twitter\)](#).

Safe Horizon se pi gwo òganizasyon ki bay viktim èd ki san bi likratif nan peyi a. Safe Horizon, ki baze antyèman nan Vil New York, ofri yon repons anti-rasis ki santre sou kliyan, ki konsidere twomatis, bay 250,000 Nouyòkè chak ane ki fè eksperyans vyolans oswa abi.

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418

[ANILE ENSKRIPSYON OU](#)